

# 1 Timoti

## Naloðulat napisulan na-vəha-sual-an aPol totosi van hən aTimoti

Ase itos naloðulat napisulan egai?

APol itosi.

APol itosi hən nəsa?

Naloðulat napisulan egai ikel mai aTimoti naþisal hən þehusuri hən þigol nauman totibau san.

APol itosi van hən ase?

APol itos naloðulat napisulan egai van hən nəmantuhmar sua tovi tarhət san len nauman, nahəsan aTimoti.

APol itos naloðulat napisulan egai ñais mai len naut a be?

Itosi van hən aTimoti pəpadaŋ hən nasihau tovi A.D. 65 nəboŋ totoh len naut a Masetonia.

- 1) APol ikel na-ke-ivoi-an mai aTimoti (1.1-2)
- 2) Naþusan husur alat siYesu mai alat lotoil a mō silat siYesu (1.3–3.13)
- 3) Nəmauran seTimoti timasvusan nanoran (3.14–4.5)
- 4) Nəvanuan gail limasləboi ləberis nañide se-Timoti hən ləbigol husuri (4.6–6.21)

### *Na-ke-ivoi-an van hən aTimoti*

<sup>1</sup> Ginau, aPol, nutos naloðulat napisulan egai. Novi ahai pispisul sua siYesu Kristo bathut nakelean siGot, aGot tolav kuv gidat dan nəsaan sidato, mai aYesu Kristo tovi nə-vatvat-viri-an sidato. <sup>2</sup> Nutos napisulan egai van hən gaiug,

aTimoti, gotovi anatugw kitin len nadəlomian.\* AGot teviol kəmas hən navoian mai gaiug, nəlon titanis gaiug, mai gai tigol nəloñ tikad natəñmat tabtab; natgalenan tovoi legəm təban aGot Tata mai aYesu Kristo, aMasta sidato.

### *Nauman seTimoti len naut a Efesus*

**3** Hum notokele mai gaiug, notoñir gaiug nəboj notovi Masetonia ke, gitoh tin a Efesus\* hən gəbikai tas galito, (alatenan dartoləboi galito), hən ke salevusan naþusanan gəgəras am. **4** Kel þuli van hən galit ke salinau masuñ hən nəbol sakitin, salihol kəmas husur nəbathuyah seJu gail husur nəbathuyah galenan ləsavi natideh. Natgalenan lugol ke lunau soþuer həni ñai be ləsagol nənauan sivan ideh hən þehusur nauman siGot tovi len nadəlomian. **5** Nokəmaiyan hən datþeþusan məs na-ləmas-buni-an togəm len nəlon toveveu mai tomasil buni, mai nadəlomian, nagərasian toþuer. **6** Galevis luyar, lusab dan naþidal enan, lupair van hən naholan kəmas. **7** Luke ləþegəm vi hai þusan hən nalo siMoses, ris lototətan hən nəsa lotokele mai lotətan hən nəsa lotosor taltal ke tokitin.

**8** Be datoləboii ke nalo ivoi, avan ideh þehusur þinor hən naləñonian siGot. **9** Datoləboii am ke nalo savi hən alat lotonor, avil ipat məs alat lotomətahuni mai alat ləsahusuri. Ipat məs alat ləsaləboi a Got mai alat lotosa. Ipat məs alat ləsalotlotu hən aGot mai alat ləsəkad nadəlomian. Ipat məs alat lotogol atəmalit o analit lotomat mai alat lotogol avan ideh am lotomat. **10** Ipat

---

\* **1:2:** Uman 16.1      \* **1:3:** Efesus: 2Kor 1.8; Masetonia: 2Kor 1.16

m̄os alat lotogol naitian tosa, naulum̄an togol naitian mai naulum̄an, napəhāut togol naitian mai napəhāut, alat lotovənoh nəvanuan hən ɬeþpur həni sum̄an naslev, nəvanuan nalibliboñan gail, alat lotoliboñ len nakotan mai avan ideh am, nəmauran san sahusur naþusan tokitin. **11** Ale, naþusan tokitin inor hən na-kel-uri-an tovoi hən aGot namənas toyalyal sidato, gai tokel mai ginau tia ke numaskel uri.

### *Navoian siNasuð topat len aPol*

**12** Nosipa vi təban aYesu Kristo, aMasta sidato, tolav nədanjan mai ginau, husur len nənauan san nudan̄ lan, ale gai eriñ ginau len nauman san. **13** Naut kəmas a m̄o nukel ke aYesu savi a Kristo aGot totabtabuh lan, mai nomədas tabtab hən alat lotohusur aYesu, mai novi nəvanuan napesəvaran,\* aGot, nəlon itan̄is ginau husur notətan hən nəsa notogole mai nəsəkad nadəlomian. **14** Len navoi-masuñ-an san, aMasta sidato erubat nəsaan sagw dan ginau, ale eviol masuñ hən nadəlomian mai na-ləmas-buni-an topat len aKristo aYesu, mai ginau. **15** Nasoran egai evi nakitinan ale inor hən nəvanuan p̄isi ləþedəlom buni, ke; aKristo aYesu egəm vi lan navile a pan hən ɬilav kuv alat lotosa dan nəsaan salito, be ginau nusa vəsa səhor galit p̄isi. **16** Avil naut kəmas nusa maienan, aGot sagol nəpanismen tonor hən ginau, be nəlon itan̄is ginau. Imaienan hən ke, len ginau notosa səhor galit p̄isi, na-toh-mədau-an tobəlav siYesu Kristo ɬiparþar. Igole hən ke alat ləþikad nadəlomian lan, ləþikad nəmauran vi sutuai, dereh leləboi ləþeris nəyalyalan

---

\* **1:13:** Uman 8.3, 9.4-5

san len nəsa togole len ginau. <sup>17</sup> Imaienan, nəvanuan pisi limasputsan nahəsan aGot mai kel ur natit pisi toyalyal, gai togole. Evi Nakinj vi sutuai, itoh vi sutuai, nəvanuan pisi lodədas ləberisi mai gai sə̄bon ɳai evi aGot! Ganan.

<sup>18</sup> Timoti, anatugw, nulav nakelean egai todaj mai gaiug, tonor hən na-pəhav-utaut-an gail husur gaiug a mō, hən gəbeləjən ɬivoi am len nəloṁ hən gəbiłal len nəbəlan tovoi. <sup>19</sup> Hən gəbimaienan, gimastəgau gat nadəlomian, nəloṁ timasmasil. Hum gotoləboii, galevis lomətahun natgalenan, ɳa nadəlomian salit ibat, imaþurþur. <sup>20</sup> Galit eru arovi aHimeneus mai aAleksada, notolav gəlaru len navəlan aSetan hən arbeləboii ke saarisor tas aGot am.†

## 2

### *Nalotuan timabe?*

<sup>1</sup> Nusor mai gaiug, noləjən masuv ke gigol nañirian, na-sor-tuñ-an, gisor mai aGot mōs nəvanuan tile gail, ale gigol nasipaan mōs nəvanuan pisi. <sup>2</sup> Gigol timaienan mōs nakinj gail mai alat lotoil a mō, hən datþitoh mədau len natəmāt, mai len naþoruan siGot, mai len nənauan tovoi, nənauan tonor. <sup>3</sup> Na-sor-tuñ-an tomaienan ivoi, igol aGot ehəhañur, aGot tolav kuv gidat dan nəsaan sidato. <sup>4</sup> Bathut eləjən ke nəvanuan pisi limakuv dan nəsaan salito\* mai legəm hən naləboian hən nakitinan. <sup>5</sup> Husur ikad aGot tosua ɳai, mai ikad gai tosua ɳai, toləboi ɬesəhar nəvanuan gail van hən

---

† **1:20:** 1Kor 5.5; Himeneus: 2Tim 2.17; Aleksada: 2Tim 4.14

\* **2:4:** Eze 18.23

aGot, naulumān, aKristo aYesu. <sup>6</sup> Gai eviol hēn gai gabag hēn ƀisar gel nēkabut hēn nēsaan tobanjis gat nēvanuan pisi.\* Nēbonj togol natenan evəhot naləŋjonian siGot len nēbonj tonor hēni. <sup>7</sup> Imagenan aGot itabtabuh len ginau hēn nēbegəm vi vanuan kaikai mai ahai pispisul sua, (nukel nakitinan; nēsalibonj), itabtabuh len ginau hēn nēbegəm vi ahai pusan silat lēsavi Ju, hēn nēbeƿusan hēn nadəlomian mai nakitinan.\*

<sup>8</sup> Nja noləŋjon ke alalumān len naut pisi limasnor masu߻, hēn lēbeləboi lēbisar hēn navəlalit gail vi məhat len na-sor-tu߻-an, nēlol paŋpanj mai na-sor-balbal-an teþuer.\*

<sup>9</sup> Be alatpəha߻ut limabe? Noləŋjon ke alatpəha߻ut lesun nahurabat tonor, tovoi len nēhon nēvanuan pisi, tosusuan nibelit, sagol alalumān hēn lēbeləŋjon galito. Salevir navurulit o riŋ nagol o nanesnes o sun nahurabat nəvat han totibau.\* <sup>10</sup> Avil ivoi hēn lēbevəhas galit hēn nagolean gail lotovoi, lotonor hēn latpəha߻ut lotokel ke lotokad naðoruan siGot. <sup>11</sup> Apəha߻ut ideh timassəsəlonj husur nasoruan siGot hēn ƀeləboii, toh mēdau, riŋ galit len navəlan alat lotopuspusan. <sup>12</sup> Nēsədaṁ hēn napəha߻ut ideh hēn ƀeƿusan. Sateil a mō hēn naulumān ideh, mai aulumān satitoh len navəlan, be apəha߻ut timasmēdau. <sup>13</sup> Husur aGot igol aAtam, beti aIv. <sup>14</sup> Mai savi aAtam todəlom nalibonjan; avil napəha߻ut, bathut edəlom nalibonjan, gai egəm vi vanuan nēsaan sua.\* <sup>15</sup> Avil

---

\* **2:6:** Mat 20.28   \* **2:7:** 2Tim 1.11   \* **2:8:** Exo 9.29; 1Ki 8.22

\* **2:9:** 1Pit 3.3   \* **2:14:** Hēn naves 13-14, ris Gen 2.7, 21-22, 3.1-6

alatpəhaňut, lěbitoh len nadəlomian mai na-ləmas-buni-an mai lěbehusur masuň hən napışal siGot len naňide tovoi len nəhon nəvanuan gail, dereh limakuv dan nəsaan salito len nəpasusan salito.

### 3

#### *Alat lotoil a mō mai natikon gail*

<sup>1</sup> Egai bogai nakelean nakitinan sua: “Avan ideh þeləjōn þegəm vi vanuan na-il-a-mō-an sua hən alat siYesu, eləjōn nauman sua tovoi.” <sup>2</sup> Nəvanuan na-il-a-mō-an imaiegai tia ke: ikad naþoruan tonor ñai len nəhon nəvanuan gail, etəgau gat nəmauran nəlahan tokade mai asoan tosua ñai, sagol təməhav hən natideh, etəgau gat nəlon gabag, ikad nənauan tovoi. Ehəhaňur hən nametþos gail lěbeňis lohoim san ale kətkəta təban galito. Ikad namitisau hən napusan. <sup>3</sup> Satərog, sagol nasənahan be ikad naňide tomədmədau, savitvituň mai saləjōn masuň hən nəvat. <sup>4</sup> Iwol hən nəbathudud san ivoi, hən anatun gail lěbesəsəloň husuri, gol nəsa tokele len nahəhaňuran. <sup>5</sup> (Avan ideh asike þeləboi þiwol hən nəbathudud san, gai tekətkəta təban alat siGot mabe?) <sup>6</sup> Savi avan sua tomadhapair van hən aGot. Bimagenan, hum ma þipatpat gai məhat ale aGot tipansem gai hum natəmat. <sup>7</sup> Len nənauan silat ləsəkad nadəlomian, ikad naþoruan tovoi hən asike nahurun þisa len nəholito mai asike þiteh len nəhai tata setəmat.\*

<sup>8</sup> Natikon gail am lumaiegai tia ke: lunor len nənauan sinəvanuan gail, ləsasumān nahit togəgel hən gai, ləsatərog, ləsaləjōn masuň hən

---

\* <sup>3:7:</sup> Hən naves 2-7, ris Tit 1.6-9

natit lotogəgəras hən lə̄bikade. <sup>9</sup> Len nəlolit topərpar lotəgau gat nakitinan hən nadəlomian aGot tovəhoti. <sup>10</sup> Hən gəbitabtabuh len avan ideh hum natikon, gimasbunus ləboi galit bai, beti avan ideh asike əisał natideh tosa len galito, riŋ galito hən lə̄bekətkəta təban nəvanuan gail hum natikon gail.

<sup>11</sup> Imagenan, nəbareab salit lumaiiegai tia ke: lukad naðoruan tovoi len nəhon nəvanuan gail, ləsasor mədas naðoruan sivan ideh, ləsagol təməhav hən natideh, lutah mai aGot len natit pisi lotogolgole.

<sup>12</sup> Hum notokele husur natikon gail, lumaiiegai tia ke: lotəgau gat nəlahan lotokade mai asoalit tosua ɳai, luwol hən anatulit gail ivi mai alat lototoh len naim salito.\* <sup>13</sup> Husur alat lotokətkəta təban nəvanuan gail tovoi, hum natikon gail, dereh legəm vi vanuan tonor masuň len nənauan sinəvanuan gail, ale leil gəgət tidań len nadəlomian len aKristo aYesu.

### *Nakitinan hən nadəlomian sidato*

<sup>14</sup> Nuvatvat viri ke asike idareh negəm hən gaiug. Be nutos nakelean galegai van hən gaiug hən ke, <sup>15</sup> nəbedədas nəbegəm tutut, gaiug geləboi nañide, nəvanuan gail limaskade len nəbathudud siGot. Nəbathudud enan evi alat siYesu, siGot tovi nəkadun nəmauran, lotovi narivbet mai nəpaudesen hən nakitinan. <sup>16</sup> Səkad nə-lon-uri-an. Datuþan len nəbathukitinan dattokad nadəlomian lan. AGot evəhoti maiegai ke:

Gai evisi tia, ikad niben nəvanuan,

---

\* **3:12:** 1Tim 3.2

aNunun e᷑usan səhoti ke inor,\*  
 aŋel gail lorisi,  
 nəvanuan nadəlomian lukel uri mai naļu᷑oh gail len  
 naut totiltile,\*  
 len navile a pan kavkav nəvanuan gail lukad  
 nadəlomian lan,  
 ale aGot ilavi vi məhat vi lan namənas.

## 4

### *Nalələgauan husur ahai p̄usan gəgəras gail*

<sup>1</sup> ANunun aGot ikele imasil ke len nəboŋ gail  
 lə̑begəmai nəvanuan galevis dereh lerin̄ gaļulan  
 nadəlomian len aKristo balai, ale lerin̄ nəlolit len  
 nanunun gəgəras gail mai na᷑usan setəmat  
 gail. <sup>2</sup> Na᷑usan tomagenan egəm len nəvanuan  
 nagəgərasan gail lotolibliboŋ, nəlolit etətan hən  
 nəsa tovoi o nəsa tosa sumān natəlai topud togol  
 nəlolit totabtabu. <sup>3</sup> Dereh likai tas nəlahan ale  
 likai tas nəhanan hən nəhanian galevis: nəhanian  
 aGot togole m̄os nəhanan hən nasipaan m̄os alat lo-  
 tokad nadəlomian mai lotoləboi nakitinan lə̑bihani.  
<sup>4</sup> Bathut natit p̄isi aGot togole ivoi, ale datbilavi  
 len nasipaan, sadatemətahun natideh.\* <sup>5</sup> Husur  
 nasoruan siGot mai na-sor-tu᷑-an igole iveveu,  
 igole ivoi.

<sup>6</sup> Timoti, gəbəkəmaienan mai nəbathudud  
 nadəlomian, dereh gevi nəvanuan nauman tovoi  
 siYesu Kristo, aGot tohis gaiug len nasoruan  
 hən nadəlomian mai hən na᷑usan tovoi  
 gotohushusuri tia. <sup>7</sup> Wake gemətahun nəbol gail ta

---

\* **3:16:** Rom 1.4; Jon 1.14   \* **3:16:** Kol 1.23   \* **4:4:** Gen 1.31;  
 Mat 15.11; Mak 7.19; Rom 14.6, 14-18

sutuai ləsakin mai nə̄bol tāvtāvor gail ale geutaут hən gaiug gabag akis hən gə̄bikad nāboruan siGot tabtab. <sup>8</sup> Husur na-utaut-həni-an hən niben ivoi kəkereh, avil nəkadean hən nāboruan siGot ivoi m̄os natit p̄isi. Ivoi hən na-vi-tarhəte-an hən nəmauran tā damərjai mai hən nəmauran vi sutuai. <sup>9</sup> Nasoran enan ekitin, goləboi gə̄beriŋ nəlōm lan, ale inor hən gə̄bedəlomi bathut nasoruan ekitin. <sup>10</sup> Natenan m̄au datorij nə-vatvat-viri-an sidato len aGot tovi nəkadun nəmauran, toləboi ɓilav kuv nəvanuan p̄isi dan nəsaan salito. Be nəvanuan nadəlomian gail? Nukele mai gaiug, Timoti, ilav kuv galit dan nəsaan salit tia.

<sup>11</sup> Gikele tidaŋ mai gēpusan hən natgalenan. <sup>12</sup> Avan ideh satinau ke gaiug gotovi ut kəmas husur gotovi nəmantuhmar, be gigol nāvide tovoi hən alat lotokad nadəlomian lə̄berisi, lə̄bigol tətov həni, gigol nāvide tomaienan len nasoran, nagolean, na-ləmas-buni-an, nadəlomian mai naveveuan sam̄. <sup>13</sup> Gēvuruŋ akis hən natosian siGot len ɳəhon nəvanuan nadəlomian gail, kel namilen mai p̄usan həni vir nagəmaian sagw.\* <sup>14</sup> Sageriŋ naviolan gotokade tipat kəmas, naviolan aGot toviol həni len na-pə̄hav-utaut-həni-an, nəboŋ alat lotokətkəta təban alat siYesu lotorij navəlalit len gaiug. <sup>15</sup> Nəlōm tidaŋ akis len nagolgolean hən natgalegai, hən nəvanuan p̄isi lə̄beris ləboii ke nauman sam̄ ivoi am tabtab. <sup>16</sup> Gelələgau hən gaiug, kətkəta gol nāpusanan sam̄ hən ɓinor, his tabtab həni. Gə̄bigole, dereh aGot

---

\* **4:13:** Luk 4.16-21

tilav kuv gaiug mai alat lotosəsəloj hən gaiug dan nəsaan samito.

## 5

### *Nəbatunau pəhañut gail, aelta gail, naslev gail*

<sup>1</sup> Timoti, sagesivoh len ahañut ideh, nədañ han tosəhor eham, be nəboj gəñigole ńinor, gisor malumñlumñ maii sumñan tovi atəmañ.\* Sor mai alalumñan, nədañ halit səbar eham, sumñan lotovi añam gail. <sup>2</sup> Sor mai abareab gail sumñan lotovi anam gail, ale len naveveuan, sor mai alatpəhañut, nədañ halit səbar eham, sumñan lotovi añavinemñ gail. <sup>3</sup> Gevi tarhət sinəbatunau pəhañut lotomñidol lotovi batunau kitin, ləsəkad nəvanuan na-vi-tarhəte-an ideh. <sup>4</sup> Be nəbatunau ideh ńikad anatun gail o aməhaibən gail, galit mñau leləboii ke limaskətkəta təban nəbathudud salito hən ləñisar gel nəkabut sinana mai tata salito artohis galito. Ləñehusur nañide tomaienan, aGot ehəhañur həni. <sup>5</sup> Nəbatunau kitin tomñidol, nəbathudud san toþuer, gai eriñ nəlon len aGot, ale igol tabtab hən nañirian van hən aGot mai na-sor-tuñ-an mños na-vi-tarhəte-an len nalenñəyal mai nalenmariug. <sup>6</sup> Be nəbatunau ideh tohusur nəmauran hən naləñonian san səbon ñai, alitenan imat, naut kəmas ke tomaur sal. <sup>7</sup> Gikel nakelean galen lotodañ mai alat siYesu hən ləñikad naþoruan tonor ñai, hən avan ideh asike ńike lotosa. <sup>8</sup> Be avan ideh asike ńekətkəta təban amahean gail, asike ńekətkəta təban nəbathudud san, ńimagenan, gai emətahun nadəlomian len aKristo, ipair dan nadəlomian enan, ale isa səhor alat ləsəkad nadəlomian.

---

\* <sup>5:1:</sup> Lev 19.32

**9** Nəboŋ gə̃bitos gat nəbatunau kitin gail, gitos gat nəbatunau pəhãut ideh, nədãm han tosəhor 60. Hən gə̃bitos gati, imagegai tia ke: etəgau gat nəmauran nəlahan tokade mai asoan tosua ḥai, **10** nəmauran san ikad nãvide mai nagolean tovoi. Nəvanuan gail loləboi lə̃bikel ur nãvide tovoi san: hum tohis anatun gail tovoi; tohəhãur hən ɬekətkəta təban namet̊os gail lohoim san; tokətkəta təban alat siYesu hum gai tovi naut kəmas; tovi tarhət silat lotolə̃jon tosa, len natit ḡisi todaj len nagolean tovoi totiltile. Tos gat nəbatunau tomaienan hən alat siYesu lə̃bevi tarhət san.

**11** Avil sagitos gat nəbatunau ideh, nədãm han səbar 60 sal. Husur nəlon tosəhsəhob hən naułumān igol ke elə̃jon ɬitoh maii, naut kəmas aKristo, ike tilah. **12** Imaienan, dereh aGot tisal̊ alitenan ke tosa bathut ke torij gabulan nãkel-gati-an nametəkav gai tokele a mō. **13** Sual am, dereh alitenan tegəm petəmas, tiyar husur naim gail, ale savi petəmas ḥai, be tepəpat soruan, tesulsul len nəsa savi esan, ale dereh tisorsor husur nəsa sanor hən ɬisor husuri. **14** Imaienan, nuke nəbatunau galenan lilah, lipasus, liwol hən nəbathudud salito, gol ke aenemi edədas lə̃visor mədas nahəsadato. **15** Husur alitenan galevis lupal sob tia hən lə̃behusur aSetan. **16** Napəhãut nadəlomian ideh ɬikad nəbatunau gail len nəbathudud san, tevi tarhət salito. Sanor hən alat siYesu lə̃bekətkəta təban galito. Bimaienan, alat siYesu loləboi lə̃bevi tarhət sinəbatunau tin gail lotopar vi-tarhəte-an.

**17** Aelta ideh toil a mō hən alat siYesu, ɬeil

a mō ɿivoi, inor ke loputsani len nənauan salito, lo᷑uri inor. Timaienan hən aelta to᷑usan mai tokel ur nasoruan siGot. <sup>18</sup> Bathut natosian siGot ike, “Sagepis gat nabuŋon na᷑buluk topal kuv namisurhuwit dan nəhavhəte husur nahudhuwit tohani evi na᷑pur᷑puran hən nauman san.” Natosian siGot ikele am ke, “Inor ke nəvanuan nau man tikad na᷑pur᷑puran tonor hən nauman san.”\*

<sup>19</sup> Sagedəlom avan ideh səbon tosor tas aelta hum tosa, timaskad nəvanuan teru o titor lotoris nəsaan enan gol loləboi ləbikel koti.\* <sup>20</sup> Be səhar alat lotoil a mō lotogolgol nəsaan sal leil len nəhon alat siYesu pisi, gikel nalələgauan mai galito hən alat siYesu am ləbemətahw.

<sup>21</sup> Timoti, nukel mai gaiug, len nəhon aGot, aYesu Kristo mai anel aGot tolekis hən galito ke, gigol natgalegai notokel buni ale gol tepitpitōv hən nəvanuan pisi, sagivoi hən tesua səhor togon.

<sup>22</sup> Sagisohotut hən gəberinj navəlam̄ len avan ideh hən ɿeil a mō. Husur ɿiteh, ehum gotoðon maii len nəsaan san. Təgau gat nəmauran naveveuan sam̄.

<sup>23</sup> Sagemun nəwai ɻai, be mun kəkereh hən nəwain mōs nabəhañum̄ tosa sil naməsahan gotkadkade.

<sup>24</sup> Nəvanuan galevis lugol nəsaan gail, gol ke nəvanuan pisi lotoləboi gail, loləboii am ke dereh lipanis. Be ikad galevis am, nəsaan salit lotosuah, dereh tevisi a tahw balai. <sup>25</sup> Len nañide tomaiengan, nəvanuan pisi loləboi nagolean gail lotovoi, be asike ləbeləboi gail, naut kəmas, navoian

---

\* <sup>5:18:</sup> Deu 25.4; Mat 10.10; Luk 10.7; 1Kor 9.9      \* <sup>5:19:</sup> Deu 19.15

galenan lodədas lə̄besusuah.

## 6

<sup>1</sup> Naslev gail lotokad nadəlomian lukad nəmauran todan, be limasnau amasta salit gabag hum lotonor hən lə̄beputsan galit len nənauan salito. Naslev gail limaienan hən avan ideh asike þemədas nahəsan aGot mai naþusan san. <sup>2</sup> Naslev þikad amasta tokad nadəlomian, sateñit nəhon van həni husur evi wawa len nadəlomian san. Teum tivoi am məsi, husur nauman san evi tarhət sinəvanuan nadəlomian, gai toləmas buni.

### *Nalə̄yonian hən nəvat*

Pusan husur natgalegai, sor malumłum hən nəvanuan lə̄behusur gail. <sup>3</sup> Avan ideh tokel ur naþusan totile, sədaṁ hən nasoruan tonor siMasta sidato aYesu Kristo, sədaṁ hən naþusan tonor hən naþoruan siGot, <sup>4</sup> gai ipatpat gai məhat masuñ, saləboi natideh. Nəvanuan tomaienan imalkəkat hən þisor levlev, hən þeñitvitu hən nasoruan gail. Natgalenan lugol nə-taþullobulosi-an, napəpehwan, nasoran tomədas nəhes gail, nənauan tosab, tosa, <sup>5</sup> mai na-sor-þalþalan. Nəvanuan gail lotomaienan, nənauan salit itaþtaþor vavinvinu, nakitinan eþuer lan. Lunau ke loləboi lə̄behusur naþoruan siGot hən lə̄bikad nəvat tosobur.

<sup>6</sup> Avil datþehəhañur hən nəsa datþikade, datþikad naþoruan siGot, namilen ke datopul hən natit tovoi. <sup>7</sup> Husur nəboj lotopas gidato, datsəlav natideh gəmai. Ale nəboj datþimat, dereh datedədas datþilav natideh van. <sup>8</sup> Be datþikad nahurabat mai nəhanian ɳai, datehəhañur hən

nəmauran sidato. <sup>9</sup> Avil avan toke þikad natite, natəmat igol ke naləñjonian hən nəsaan gail esəhor gai, ekəkos lan, ike tigol natit tisobur tomelmel togol nasənahān. Naləñjonian gail lolivi vi pan vəmasig hum tomadunđuŋ len tas. <sup>10</sup> Husur na-ləñjon-buni-an hən nəvat evi nəkadħut nəsaan. Galevis lotoləñjon masuň hən nəvat, lupal sob dan nadəłomian gol ke nalolosaan salito togol nəmanuŋ topəŋas masuň len nəlolit gabag.

### *Nakelean van hən aTimoti*

<sup>11</sup> Be gaiug gotovi siGot, gam dan natgale-nan, ale gam kitev nanoran, naboruan siGot, nadəłomian len aGot, na-ləmas-buni-an, nə-dan-ħuri-an tobəlav, mai na-gol-mədau-həni-an vi təban nəvanuan gail. <sup>12</sup> Daŋ þur nəħalan tovoi mños nəsa dattokad nadəłomian lan. Təgau gat nəmauran vi su-tuai aGot tokis gaiug hən gəbikade nəboŋ gotokel kot nadəłomian sami len aYesu Kristo len nəhon nəvanuan lotosobur. <sup>13</sup> Nukele hən gaiug len nəhon aGot tolav nəmauran mai natit pisi, len nəhon aYesu Kristo tokel kot na-kel-koti-an tovoi len nəhon aPontius Pilate,\* nukele hən gaiug ke, <sup>14</sup> gigol kavkav hən nəsa aGot toləñoni, nəsaan teħuer. Gole vir aMasta sidato, aYesu Kristo ħevisi. <sup>15</sup> Dereh tevisi balai len nəboŋ aGot tolekis həni. AGot, gai səbon iyalyal, tonor hən nəvanuan gail lotosal suhi, naKiq hən nakiq gail, Nasuň tovi masta hən natit pisi.\* <sup>16</sup> Gai səbon edədas þimat, itoh len namial nəvanuan gail lotodədas ləbəgəm pəpadan həni, səkad avan ideh torisi, səkad avan ideh toləboi

\* **6:13:** Jon 18.36-37

\* **6:15:** Deu 10.17; Psa 136.3

þerisi boj ideh.\* Nahəsan tiyalyal! Nədanjan tipat lan vi sutuai sutuai! Ganan.

<sup>17</sup> Timoti, kel þuli hən alat lotopul hən natite len nəboj ta daməŋai ke salipatpat galit məhat len nəlolito, saleriŋ nəlolit len natit gail topat daməŋ be þimasig pelan, avil lerin nəlolit len aGot tolav masuň hən natit þisi hən datbehəhaňur.\* <sup>18</sup> Kel mai galit m̊au ke ligol navoian, lepul hən nagolean tovoi, lehəhaňur hən ləbeviol, len nəsa lotopul həni lehəhaňur hən ləbevi tarhət sinəvanuan gail. <sup>19</sup> Len nañide tomaiengan, leum m̊os nəpaudesen hən nakonviolan aGot tokade m̊os galit balai, ale letəgau kot nəmauran tokitin.\*

<sup>20</sup> Timoti, kətkəta kəkol hən nəsa aGot torinjı len navəlam̊. Pair dan nasoruan totaňtaňor, na-sor-kəmas-an, na-sor-levlev-an silat lotosor tas gaiug len nəsa lotokis suluň hən naləboian. <sup>21</sup> Galit galevis lotonau ke lotokad naləboian enan lusab dan nadəlomian.

Navoian aGot toviol kəmas həni, tipat len gaiug.

---

\* **6:16:** Exo 33.20; Psa 104.2

\* **6:17:** Luk 12.20

\* **6:19:** Mat 6.20

**Nasoruan siGot len nasoruan ta Uluveu  
The New Testament in the Maskelynes language of  
Uluveu, Vanuatu**

**Niutestamen long lanwis Maskelynes blong Uluveu,  
Vanuatu.**

**Le Nouveau Testament dans la langue Maskelynes de  
Uluveu, Vanuatu.**

copyright © 2013 Wycliffe Bible Translators, Inc.

Language: Maskelynes

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 11 Nov 2022 from source files  
dated 9 Oct 2020

cb9da196-fced-5a7c-9540-74db5e4270fd